

## Schnitzelbank 2014 Männerchor Kaltbrunn Gruppe 2

Im Sunneberg då tuet er baue, s'gfallt em schiinbar nümme z'Gae,  
Es siig technisch wäg de Stüüre z'Kaltbrunn richtig.  
Er thront jetzt dobe i siim Riich, was and'ri reded isch ihm gliich,  
uf Dächer abeluege isch ihm wichtig.  
Das G'schäft mit Dächer und Fassade muess schiinbar ganz guet rentiere  
drumm tuet er s'vorig Gäld grad sofort i'ne Stützmuur investiere.

Mit Läserbrief und Flyer tüend sich, b'sorgti Eltere jetzt wehre,  
gäg de Stundeplan de Neui, uufbegehre.  
Der G'meindrät muess interveniere, tuet der neui Plan studiere,  
sait die Änderige chasch nöd durestiere.  
Sind d'Lehrer nöd flexibel oder tuet då d'Leitig krass versäge?  
Nach dem Debakel sait de Hugo, – Thomas chumm mir lönd üüs pfläge.

E so'ne Abbruch isch en Chääs und macht üüs au gewaltig rääss,  
er isch derzue mit Baggerlärm und Staub verbunde.  
En neue Block söll dött entstah und Luxuswohnige söll's ha,  
wer das no zahle cha händ mir nöd useg'funde.  
Entsorgigspark no umplatziere isch es heikels Unterfange,  
und das Problem das bliibt ganz sicher jetzt allei am Markus hange.

Mit em Verkehr isch das e so'ne Sach, nei der nöd von're Hochzigsnacht,  
nei, ganz banal der Alltag uf de Strässe.  
Ob Chreisel ganz oder au halb, die mached doch mit üüs nur s'Chalb,  
de Chauffeur vo der Post der schniidt nur no Grimasse.  
Es isch au d'Benknersträss es leidig's Thema wenn du dött im Stau stähst.  
Zum das z'vermiide wär's doch g'schiider wenn't s'ganz Jåhr i d'Ferie gähst.

S'gåht uuf und ab und nächstens zue, hätt mit em Rössli nöd viel z'tue,  
betrifft de Kiosk däa wo strittet mit em EWee.  
Sie händ bim G'richt z'Sankt Galle g'sait, dass Strom und Zitige sich nöd vertreit,  
und drumm der Marcel müessi jetzt der Huet neeh.  
Der Brief vom Günter i der Ziitig nützt au nüüt, s'sind Illusione,  
statt G'richt gib all's zum halbe Priis, gäll Marcel, s'würd sich besser lohne.

Då z'Kaltbrunn isch der Lärm nöd ganz der gliich wie z'Schänis dett im Eiche,  
für en Tennisfan isch das es düttlich's Zeiche.

Då z'Kaltbrunn isch me nöd g'rad so empfindlich, sait schön danke  
unverbindlich,  
stellt der Turnverein e soo doch d'Weiche.

Ganz ohni Stutz e neu Garderobe tüend mir so erreiche  
und nå ein Vorteil hät's, du muesch jetzt nümm i d'Wiese use --(seiche)  
„brünzle“

E Fusion muess gründlich überleit sii, chasch nöd eifach säge – nei sie,  
doch schlussendlich muesch du dich entscheide.

Ob Fortschritt oder Stagnation, ob Angst vor Stüüre, - um der Lohn,  
was au passiert tüend üsi Chüeh gliich witerweide.

Die ewiggestrig SVP sait nei, då sind sich alli einig,  
Zwei Tag vorher au d'CVP, nur d'FDP die hät kei Meinig.

Offiziell mit Tanz und Coctail's isch neu Rende's Bar in Kaltbrunn,  
bi der Steinebrugg dött i Brügmühli's Chäller.

Als Konkurrenz zum Platinclub am an'dre Endi vo Kaltbrunn,  
g'sehsch wunderhübschi Fraue und diis Herz schlaht schnäller.  
Gäh'sch denn go Google denn erwartet dich e Webside unwahrschiinlich,  
Bi jedem Link heisst's: „in Bearbeitung“ – isch das nöd mega-piinlich?